

Innuttaasut tarnimikkut napparsimasut innuttaasut akornanni inooqataaqilertarnerannut annertusaanissaq anguniarlugu tarnikkut nappaatilinnut immikkoortortaqarfik aammalu pinerluttunik isumaginnittoqarfimmi sulisut ilinniakkamik qaffassaqqiffigisinnaasaannik immikkut suliaqarnissaq siunertaralugu Naalackersuisut sukkanerpaamik Rigsmyndighed-mut attaveqarnissaat pillugu Inatsisartut aalajangiiffigisassaattut siunnersuut.

(Inatsisartunut Ilaasortaq Anna Wangenheim, Demokraatit)

Akissuteqaat

(Meeqqanut, Inuusuttunut, Ilaqutariinnut Peqqissutsimullu Naalackersuisoq)

Siullermeerneqarnera

Naalackersuisut Anna Wagenheimip Demokraatineersup Inatsisartut aalajangiiffigisassaattut siunnersuutaanut qujapput.

Tarnikkut nappaatilinnik pinerluuteqarsimasunik nakkutilliivik tassaavoq inersimasunik tarnikkut nappaatilinnik sullissinermi immikkut qaffasissusilimmik ilisimasaqarfik¹.

Pinerlussimasut tarnikkullu nappaateqarnertik pissutigalugu pineqaatissinneqarnissamut naleqqutinngitsut nalilerneqarsimasut tarnikkut nappaatilinnut pinerluuteqarsimasunut isumaginnittoqarfimmut inissinneqartarput. Ullumikkut tarnikkut nappaammik katsorsarneqartussatut eqqartuunneqarsimasunik katsorsaanerit Dronning Ingridip Napparsimavissuani A1-imit, tarnikkut napparsimasunut tamanut immikkoortortaqarfiusumit isumagineqartarput. Immikkuullarissumik pisarialimmillu unitsitsinerit amerlanertigut Danmarkimi Århus Universitetshospitalimi Tarnimikkut Nappaatilinnut Pinerlussimasunut Immikkoortortaqarfimmut R3-mut pisarput.

Tarnimikkut napparsimasut pinerluuteqarsimasut eqqartuussut najoqqutaralugu inissinneqanngitsut illoqarfimmi najugarisaanni Nunap immikkoortuani tarnikkut nappaatilinnut isumaginnittoqarfimmi unitsinneqaratik malinnaavigineqartarput tarnikkullu napparsimasunut neqeroorummit nalinginnaasumit, pingaarnertut nakorsaatinik katsorsaanerimik sullinneqarlutik aamma najukkami sulisorineqartut najoqqutaralugit peqqissaanermik sulisorineqartunit malittarineqarlutik.

Tarnimikkut napparsimasut pinerluuteqarsimasut Tarnimikkut nappaatilinnut immikkoortortaqarfimmut A1-imut R3-mullu unitsinneqartartut amerliartortut takusinnaavagut. Tamatuma kingunerisaanik inissatigut sulisoqarnikkullu amigaateqarnermik, sillimaniarnermik aamma tarnimikkut nappaatillit immikkoortortaqarfiini sulinermi avatangiisinut unammillernartoqarpoq.

Peqqinnissaqarfik tarnikkut napparsimasunut pinerluuteqarsimasunut immikkoortortaqarfimik immikkut sinittarfilimmik katsorsaasarfilimmilluunniit peqanngilaq. Maannakkorpiar-

¹ Maannakkorpiaq tarnikkut nappaatillit pinerluuteqarsimasut katsorsarneqartussatut eqqartuunneqarsimasut 93-it missaanniipput.

lu Tarnikkut nappaatilinnut immikkoortorta qarfimmi isumalluutit pioreersut eqqarsaatigalugit napparsimasunut eqqartuunneqarsimasunut neqeroorusiortoqarsinnaanngilaq. Tarnikkut napparsimasunik pinerluuteqarsimasunik pitsaanerusement inooqataaqqissinnaalersitsisarnermik aaqqiiniarnerit peqqinnissaqarfiup kisimiilluni kivissanngilai. Peqqinnissaqarfik katsorsaanissamik akisussaaffeqarpoq, kommunillu, inatsisilerinnermut suliassaqarfiit, isumaginninnermut suliassaqarfiit, suliffissaqartitsinnermut suliassaqarfiit il.il. inooqataaqqissinnaalersitsisarnermut tunngatillugu pingaarutilittut inissisimallutik.

Pinerluttunik Isumaginnittoqarfik katsorsagassanngorlugit eqqartuunneqartut Tarnikkut nappaatilinnut immikkoortorta qarfimmi nakorsaaneq katsorsaanermik akisussaasoq suleqatigalugu nakkutilliisarpoq. Pinerluttunut isumaginnittoqarfimmi piginnaasatigut amigaateqartoqarneranik, periarfissanik pioreersunik iluarsivigineqarsinnaanngitsunik peqarneranik paasisuttissaqanngilaq².

Kalaallit Nunaanni Eqqartuussiveqarneq pillugu Siunnersoqatigiit 2022-mi septemberimi ataatsimiinneranni Kalaallit Nunaanni Pinerluttunik Isumaginnittoqarfimmit ilisimatitsissutigineqartumi allassimavoq:

"Kriminalforsorgen i Frihedip tarnimikkut napparsimasunut pinerlussimasunut tunngatillugu tarnimikkut nappaatilinnut immikkoortorta qarfik qanimut suleqatigaa, tassunga ilanngullugu Aarhusimi Skejbyimi tarnikkut napparsimasunut immikkoortorta qarfimmu matoqqasumut R3-mut inissinneqarsimasunut tunngatillugu. Taakku akornanni tarnikkut napparsimasunik pinerlussimasunik, nammineerlutik Danmarkimi najugaqalersunik unammilligassaqarpoq. Taakku oqartussat pineqartut akornanerpiaq aaqqiiniarneqarput."

Peqqissutsimut suliassaqarfimmi ilaatigut Pikkorissarnermut Aningaasaateqarfik aamma Ilinniaqqinnermut immikkoortitat, taamaalilluni ullumikkut Peqqinnissaqarfik pisariaqartitat malillugit sulisorisat pikkorissartinneqarsinnaareerput.

Tassunga ilisimatitsissutigineqarsinnaavoq nunap immikkoortuani tarnikkut nappaatilinnut sullissisunut isumasioqatigiinnissamik pilersaarusiortoqarmat. Isumasioqatigiinnerup ilaani tarnikkut napparsimasunut immikkoortorta qarfimmi suliassat pisussaaffiillu sammineqassapput, soorluttaaq tarnimikkut napparsimasut pinerluuteqarsimasut eqqartuuss-taannik nakkutilliineq pillugu Pinerluttunik isumaginnittoqarfimmit saqqummiisoqarumaartoq.

Naalackersuisut tarnimikkut napparsimasunut pinerlussimasunut suliassaqarfimmi pitsanngor-saanissamut pisariaqartitsisoqarneranik siunnersuuteqartoq isumaqatigaa. Suliassaqarfili ajornakusoorpallaarnera pissutigalugu iluatsilluartumik innuttaasut akornanni inooqataaqqiler-tarnissaannut aaqqiissutissanik aallartitsisoqannginnerani unammilligassat qulaajaqqaane-qarnissaat pisariaqarpoq. Taamaattumik Naalackersuisut allannguutissatut siunnersuummik tullinnguuttumik uannga inassuteqarput:

² Tassunga atatillugu oqaatigineqassaaq eqqartuussanik nakkutilliineq Pinerluttunik isumaginnittoqarfiup ulluinnarni pingaarnertut suliassarimmagu.

UKA2024-mi saqqummiunneqartussatut tarnimikkut napparsimasut innuttaasut akornanni inooqataaqqilernissaanut ilungersunartut akornutaasullu qulaajarneqarnissaat kiisalu suliniutissanik iliuuserisassanillu siunnersuusiornissaq anguniarlugu Naalackersuisut suliniummik pilersitsinissaannut peqquneqarnissaat pillugu Inatsisartut aalajangiiffigisassaattut siunnersuut.